



23. januar 2015

UPA 2015/133

Inatsisartut suleriaasianni § 36 naapertorlugu apeqquteqaat tunngavigalugu oqallinnissamik imaattumik siunnersuuteqarpunga:

Aalisarnerup nutarterniarneqarnera qanoq naammassiniarneqarnersoq pillugu apeqquteqaat aallaavigalugu oqallisissiaq.

(Inatsisartunut ilaasortaq Ane Hansen, Inuit Ataqatigiit)

2002-mi Inatsisartunut ilaasortanngorpunga aalisarnermut inatsisip nutarterneqarnissaa kissaatigineqarluni Inatsisartuni oqallisigineqartoq, ukiullu ingerlanerini Inatsisartuni ilaasortat arlallit nutarterinissamik siunertaqarlutik qulaajaanissamik assigiinngitsunik siunnersuuteqartarsimapput. Tamatumalu kinguneranik aalisarnermi atukkat pillugit nalunaarusiat ikigisassaangitsut saqqummiunneqartarput aalisarnermik soqutigisaqartut kattuffiit qanimut suleqatigalugit suliarineqartarlutik.

2007-mi Aalisarnermut Naalakkersuisuusup aalisarnermi inatsisissaq ataatsikkut suliareqqullugu saqqummiukkaluarpaa Inatsisartunilu tamarmiusunit piumasarineqartoq malillugu suliaq kinguartinneqarpoq aalisarnermi atukkat pillugit qulaajaasussamik ataatsimiisitaliarsuarmik pilersitsisoqarnissaa kissaatigineqarluni.

Aalisarnermut Ataatsimiisitaliaasup aalisarnermik soqutigisaqartunik kattuffinnik attuumassuteqartunik, aningaasaqarnikkut allaffissornikkullu immikkut ilisimasalinnik inuttaqartinneqartup suliani naammassivaa peqataasunit ataatsimoorfigineqartut saqqummiunneqartoq.

Inassuteqaatit aallaavigalugit aalisarnermut inatsisissatut siunnersuutip immikkoortua alloriarneq siullertut taaneqartoq 2011-mi Naalakkersuisunik saqqummiunneqarpoq Inatsisartunilu amerlanerussuteqartunit tunuliaqutserneqarluni naammassineqarpoq. Siunertarineqarluni alloriarnerup aappaa apeqqutinik makkuninnga isummorsorfiussasoq inaarutaasussarlu tullertut saqqummiunneqarumaartoq:

Raajarniarnermi kinguaariit nikinnissaannut ajornartorsiuteqarneq.

Nunat allamiut piginnittuusinnaanerannut tunngasut.

Tulaassisussaataaneq.

Pisuussutininik atuinermut ernianut tunngasut.

Sinerissamut qanittumi aalisarnerup avataanilu aalisarnerup immikkoortinneqarnera.

Pisassiissutininik pigisat atorunnaarsinneqarsinnaaneranni piffissarititaasoq.

Mannalu tikillugu inatsisissap immikkoortuata aappaa suli saqqummiunneqanngilaq. Aalisarnermut Ataatsimiisitaliarsuup inassuteqaatai malillugit suliaq suliarineqartussatut siunniussaammat mannaluk tikillugu allatut ittumik inaarutissamik saqqummiussisoqarsimangimmat, apeqquteqaat aallaavigalugu oqallisissiaq manna

aqqutigalugu Inatsisartuni ilaasortat qanoq inaarutaasussanik siunertaqarnersut paasiniaavugut, aalisarnermi inuutissarsiuteqartut kisiisa pinnagit apeqqut inuiaqatigiit aningaasarsiornikkut siuariartortumik ingerlaqqinnissaannut inatsisip inaarneqarnissaa pisariaqarluinnarmat.

Manna tikillugu aalisarnermik inuutissarsiuteqartuunerput aningaasaqarnikkut isaatitsissutitsinni pingaarnersaavoq sulilu ukiorpassuit tulliuttut taamaattuassalluni. Piffissami kingullermi Naalakkersuisunit nassuerutigineqarpoq aningaasarsiornikkut isaatitsissutigisassatut isumalluutigilluagarput aatsitassarsiorneq uuliasiornerlu ukiuni qaninnerpaani ilimasaarutigineqarsimasutuut malunnaatilimmik isaatitsissutaanavianngitsoq. Taamaammat aalisarnermi isumalluutit annertunerpaamik inuiaqatigiinni isumalluutigineqarnerisa qaffassarnissaanut inatsisip nutarterneqarluni aallarereernikup peqqissaarussamik inaarneqarnissaa isumagisassatta pingaarnertit ilagaat.

Tamatuma saniatigut oqaatigissavara allatigut suliat aallartinneqarsimasut inaarneqarnissaat pingaartilluinnaratsigu, tassalu piujuaannartitsinissaq nungusaataanngitsumillu aalisarnermi raajarniarnermilu aalisakkanillu assigiinngitsunik aqutsinerup ersarissarneqartariaqarnerat malittarisassaliornerallu, maannalu nunarsuarmioqatigiit akornanni niuernermi pisisartuniillu pingaartinneqartut tunaartaralugit inerisaajuarnissap ingerlatinneqartuarnissaa.

Aalisarneq isumalluutitsinni suli pingaarnersaammat aalisarnermi inatsisip peqqis-
saartumik inaarneqarnissaa tamatta pisussaaffigaarput, unalu apeqquteqaat
aallaavigalugu inaarutaasussatut isumaliutisi oqalliseqataaffiginissaat qilanaararput.